



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Odluka
o utvrđivanju posebnog značaja za Grad Sarajevo
za Udruženje za podršku i promociju jevrejske kulture, tradicije i turističkih potencijala
„Hagada“
(Prijedlog)

Predlagač: Gradonačelnica
Obradivač: Gradska služba za lokalnu samoupravu

Sarajevo, novembar 2023. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23), kao i na osnovu člana 8. stav (1) Odluke o načinu sticanja statusa udruženja i fondacija od posebnog značaja za Grad Sarajevo („Službene novine Kantona Sarajevo“, broj 51/21), Gradsko vijeće Grada Sarajeva, na __. sjednici održanoj dana __. __. 2023. godine, donijelo je:

(Prijedlog)

**Odluku
o utvrđivanju posebnog značaja za Grad Sarajevo
za Udruženje za podršku i promociju jevrejske kulture, tradicije i turističkih potencijala
„Hagada“**

Član 1.

Ovom Odlukom utvrđuje se da je Udruženje za podršku i promociju jevrejske kulture, tradicije i turističkih potencijala „Hagada“ od posebnog značaja za Grad Sarajevo, i to kao organizacija čije aktivnosti na očuvanju vrijednosti koje su sarajevski Jevreji ostavili i poklonili svom gradu, te promoviranju jevrejskog kulturnog naslijeđa u Bosni i Hercegovini i Sarajevu, značajno doprinose isticanju jedinstvenog kulturno-historijskog naslijeđa Sarajeva, te jačaju multikulturni i multietnički karakter Grada Sarajeva, što predstavlja vrijednosti od posebnog značaja za Grad Sarajevo.

Član 2.

Djelatnosti Udruženja za podršku i promociju jevrejske kulture, tradicije i turističkih potencijala „Hagada“ sufinansiraju se iz sredstava Budžeta Grada Sarajeva, iznosom od 5.000 KM (pethiljada KM), tokom više budžetskih godina, dok Udruženje ispunjava opće i posebne uslove za sticanje statusa posebnog značaja za Grad Sarajevo, odnosno do prestanka statusa, u skladu sa Odlukom o načinu sticanja statusa udruženja i fondacija od posebnog značaja za Grad Sarajevo.

Član 3.

Nadzor nad provedbom Odluke vrši gradonačelnica Grada Sarajeva putem nadležne Službe, Gradske službe za lokalnu samoupravu.

Član 4.

Izmjene i dopune Odluke vrše se na način i po postupku za njeno donošenje.

Član 5.

Odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVALAČI GRADSKOG VIJEĆA

Jasmin Ademović

Broj:
Sarajevo, __. __. 2023. godine

OBRAZLOŽENJE

PRAVNI OSNOV

Pravni osnov za donošenje Odluke sadržan je u članu 31. stav (1) tačka b) Statuta Grada Sarajeva, kojim je propisano da Gradsko vijeće donosi odluke, druge propise i opće akte i daje njihovo tumačenje, kao i u članu 8. stav (1) Odluke o načinu sticanja statusa udruženja i fondacija od posebnog značaja za Grad Sarajevo, čijom odredbom je, između ostalog, utvrđeno da Gradsko vijeće Grada Sarajeva donosi konačnu odluku o utvrđivanju posebnog značaja za određeno udruženje ili fondaciju, na prijedlog gradonačelnice Grada Sarajeva.

RAZLOZI DONOŠENJA

Udruženje za podršku i promociju jevrejske kulture, tradicije i turističkih potencijala „Hagada“ obratilo se gradonačelnici Grada Sarajeva Zahtjevom za sticanje statusa udruženja od posebnog značaja za Grad Sarajevo. Uz zahtjev su dostavljeni dokazi o ispunjavanju općih i posebnih uslova iz Odluke o načinu sticanja statusa udruženja i fondacija od posebnog značaja za Grad Sarajevo.

Udruženje „Hagada“ bavi se očuvanjem jevrejske kulture i tradicije te veoma aktivno radi na očuvanju vrijednosti koje su sarajevski Jevreji ostavili i poklonili svome gradu. Pored očuvanja vrijednosti doprinosi jevrejske zajednice razvoju grada Sarajeva, Udruženje „Hagada“ je i veoma aktivno u promoviranju jevrejskog kulturnog naslijeđa i zahvaljujući ovom udruženju Bosna i Hercegovina i Sarajevo postali su dio Evropske rute jevrejskog naslijeđa.

Između brojnih aktivnosti i projekata koje provodi Udruženje „Hagada“, ovdje ćemo pobrojati samo dio: svake godine u okviru Bašćaršijskih noći održava se manifestacija „Sefardska noć“ – predstavljanje bogate kuhinje bosanskih sefarda, organizacija koncerata sefardskih romansi i književnih večeri, publikovanje knjiga: Kuhar bosanskih sefarda, Sarajevski Purim / The Sarajevo Purim, organizovanje naučne konferencije i izložbe „Sarajevski Purim“ 2019. godine u koju je uključena Islamska zajednica i Jevrejska zajednica Bosne i Hercegovine (zajednički projekat), u gradskoj Vijećnici 2020. godine priređena je izložba „Sarajevski Purim“ te je ovaj događaj postao tradicionalan, permanentna promocija Sarajevske Hagade, kao brenda za razvoj kulturno-historijskog turizma u Sarajevu i Bosni i Hercegovini, itd.

Gradonačelnica je, u skladu sa odredbama Odluke o načinu sticanja statusa udruženja i fondacija od posebnog značaja za Grad Sarajevo i prijedlogom nadležne službe, uputila Gradskom vijeću Grada Sarajeva prijedlog da se za Udruženje za podršku i promociju jevrejske kulture, tradicije i turističkih potencijala „Hagada“ utvrdi status od posebnog značaja za Grad Sarajevo. Imajući u vidu izneseno, te cijeneći da navedeno udruženje svojim djelovanjem doprinosi očuvanju i jačanju Sarajeva kao sredine u kojoj vlada međunacionalno povjerenje i tolerancija, i kao dosadašnjeg i budućeg središta, nacionalnog, kulturnog, ekonomskog, političkog i vjerskog života svih naroda u BiH, Gradsko vijeće Grada Sarajeva donijelo je ovu odluku.

FINANSIJSKA SREDSTVA

Finansijska sredstva za realizaciju ove odluke obezbjeđuju se u Budžetu Grada Sarajeva.